


BAHA'I

Religion universal

pro le humano moderne



RESOLUTION

del 10e Conferentia International de Interlingua 4-11 de agosto 1991 in Helsingborg, Svedia

Le religion Baha'i, originate in Persia in 1844, proclama le unitate de omne religiones mono-theistic e un programma in 12 punctos pro un societate human plus juste e un vita plus felice sur le terra, i.a. le cerca independente del veritate, un tribunal international, plen equalitate inter viros e feminas, education pro omnes e **introduction de un lingua international**.

Le participantas del 10e Conferentia International de Interlingua, ab 14 paises de Europa, Japon e le Statos Unite de America, constata

que il es un deber religiose pro le Baha'is ager in favor de un lingua international;

que le facto que Interlingua es elaborate per scientistas professional corresponde al exigentias principal de Baha'i: ("... un sol homine non pote construer un lingua mundial." Abdu'l-Baha in London, pagina 95.)

que le cognoscentia de Interlingua del Baha'is in le multe, multissime paises esserea de un valor practic immense, **primo** pro lor communication interne, **secundo** como base pro studios del linguas romanic e anglese le quales, naturalmente, etiam in le futuro remane utile pro le diffusion de lor fide.

Le Conferentia International de Interlingua in Helsingborg propone que le Assemblea Spiritual de Baha'i recommenda a cata Assemblea local que al minus duo membros (sed preferiblemente multes) apprende maestrar Interlingua, e que cata membro vivente isolate etiam lo apprende.

Le Conferentia recommenda emphaticamente que membros del Union Mundial pro Interlingua in omne paises immediatemente traduce iste resolution e lo distribue a omne adresses de Assembleas de Baha'is, e que illes offere – intra le limites del neutralitate del U.M.I. in questiones de religion e politica – tote le assistentia possibile in le information e apprension de Interlingua al Baha'is.

UNION MUNDIAL PRO INTERLINGUA

BAHA’I

**Religion universal
pro le humano moderne**

Un presentation basate sur un essayo per Arthur Dahl:
Baha’i World Faith for Modern Man
Traduction in Interlingua per Ingvar Stenström

Societate Svedese pro Interlingua
(Svenska Sällskapet för Interlingua)
1992

Originalmente publicate in 1992 per
Svenska Sällskapet för Interlingua
(le Societate Svedese pro Interlingua)
con ISBN 91-971940-0-X

Publicate como e-libro sin cambios (excepte le deletion de ancian
adresses postal) in 2021

© 1992


Assemblea Spiritual National pro le Baha'is in Svedia
Götavägen 22
S-191 44 SOLLENTUNA, Svedia
Tel. 46-8-6257070

Informationes ulterior obtenibile ab le Assembleas Spiritual National. Pro
trovar le adresses, vide le libro local o regional de telefonos sub “Baha’i”!

Informationes concernente Interlingua:
Union Mundial pro Interlingua
www.interlingua.com

Le fide Baha'i ha como objectivos i.a.

- **Realisation del unitate del genere human**
- **Recognition del unitate fundamental del religiones**
- **Recerca personal e independente del veritate**
- **Liberation ab prejudicios e superstition**
- **Harmonisation del religion e del scientia**
- **Derectos equal e opportunitates equal pro viros e feminas**
- **Adoption de un lingua auxiliar international**
- **Introduction de un sistema juste del economia mundial**
- **Creation de organisationes (tribuna mundial etc.) que pote mantener le pace universal**



Templo Baha'i de Wilmette presso Chicago, U.S.A.

Objectivos

Le fide Baha'i es un nove religion universal independente, cuje objectivo es un revivification spiritual del humanitate, destruction del muros divisive inter le populos e le poner de un fundamento pro un societate global unificate e construite sur justitia e amor.

Le fide declara que le problema principal de nostre epocha es le dissolution de un serie de oppositiones profumente inradicate, que es interrelata e penetra planos differente del societate: Conflictos inter ideologias, nationes, religiones, racias e classes. Tal conflictos in combination con le armas destructive de nostre tempore menacia le futuro de nostre presente civilisation. Illos da un direction false al aspirationes e effortios del scientia e del technica in un epocha quando le humano se trova immediatemente ante le discoperta del mysterios del spatio e ante le utilisation de energias nove. Illos consume un grande parte de nostre fortias productive e face deviar nostre attention ab le lucta contra nostre inimicos natural: ignorantia, maladias e fame.

Le opinion mundial presta, de plus in plus, attention al necessitate de

eliminar iste oppositiones in le mundo integre pro possibilisar un conservation del pace. Al mesme tempore le conviction cresce que omne iste oppositiones ha lor causa principal in le manco de un motivation spiritual – un fortia moral o ethic, satis forte pro resister fortias social divisive e pro guidar le aspirations del humanitate in directiones constructive. Regardante le religiones – que durante le epochas ha essite le fonte de directivas spiritual e de adjuta – nos trova que illos se distingue acremente le un del altere, e que illos ipse constitue un campo major de conflictos. Illos existe como unitates que exclude le un le alteres e ha per le seculos developpate, in lor adherentes, attitudes divergentissime verso le vita, le quales impedi comprehension universal e cooperation inter le populos.

Pois que un ver solution de nostre problemas politic e economic pote esser acquirite solmente sur le nivello international, qualcosa debe esser facite pro construer pontes inter le grande oppositiones spiritual que existe inter le confessores del religiones. Per exemplo il es impossible instituer un governamento mundial tanto longe que diverge si forte conceptiones fundamental, objectivos e evalutationes de partes differente del population del mundo.

Lo que es besoniate es un nove attitude spiritual, le qual, al mesme tempore reconcilia le religiones e sta in accordantia con le moderne principios scientific e rational. Nos besonia qualche cosa que offere evalutations, que omne homines pote acceptar e practicar, e que da al vita un senso plus profunde. Pro satisfacer iste besonio le fide Baha'i proclama dogmas, fundate sur le cognoscentia que un revelation religiose se evolve gradualmente.

Revelation progressive

Le ver impedimento pro establisir unitate religiose ha essite que cata religion mundial ha insistite que su fundator ha possedite un certe mesura de autoritate final. Le fide Baha'i insenia que iste disunitate traditional origina in un misinterpretation del senso symbolic que ille grande spiritos ha volite exprimer in lor parolas. Le idea del Baha'is es, que Deo – le fortia incomprendibile que es responsabile del creation integre – duce e adjuta le humanitate per seliger e inspirar, a certe intervallo de tempore, un homine. Ille, le fundator de religion, ha tres cargas principal: 1. Re-establisir le veritates spiritual eterne como le commandamento del amor, le quales

se retrova in le majoritate del religiones; 2. dar leges e dogmas adaptate al besonios del societate human in su era; facer emanar in le mundo un fortia spiritual incomprendibile sed mesurabile in su effectos, le qual poco a poco face millions de homines recognoscer le origine divin del fide, lo que da como resultado que le nove religion deveni le instigamento del proxime periodo de grande attingimentos in le civilisation.

Le clave al interpretation Baha'i del signification del religion pro le developpamento del societate es le accento que on pone sur le periodicitate e le accordo con le evolution in iste influentia. Si Deo totevia ha date al humanitate alcun guidantia il es logic que ille lo ha facite ab le primissime comenciamiento del existentia del humano como specie e que ille continuara facer lo etiam in le futuro. Quando cambiamentos e progresso ordinate es un fenomeno si general in nostre existentia proque non esserea tal etiam nostre evolution spiritual?

Un Baha'i considera le messageros de Deo como homines inspirate, qui presenta le parolas de Deo e se trova sur un plano de existentia multo superior a illo del homine ordinari. Ille les venera in lor qualitate de ductores spiritual elevate e como fontes del cognoscentia de Deo pro le homines, sed ille non adora ulle de iste messageros como un incarnation de Deo. Acceptante omne le previe fundatores de religiones – Krishna, Buddha, Zarathustra, Moses, Jesus e Mohammed – como toto equal in lor position de manifestatores de Deo, e recognoscente lor religiones como expressiones real e ver del message de Deo, le fide Baha'i reconcilia le conceptiones fundamental de iste fides, *sin* demandar un rejection del loyalitate a ulle del fundatores o al credo in su divinitate.

Le grande differentias in lor dogmas, como on los comprende hodie, pote explicar se per le cambiamentos que ha facite le messageros sequente pro satisfacer le exigentias sempre cambiante del societate, e per le facto que multes del dogmas nunc valide intra le ecclesias non emana ab le parolas original del manifestator de Deo sed ab dogmas e interpretationes posteriormente addite. Le Baha'i opina que omne iste religiones principal es, in fundo, partes del mesme religion que se trova in evolution e que se repete e se resuscita periodicamente per le arrivata de un nove profeta, qui recipe sagessa e energia spiritual ab le mesme fonte como le predecessores.

Le Baha'i opina que nostre tempore pote, in multe respectos esser regardate como comparabile con le epochas quando grande fundatores de religiones ha venite pro illuminar e guidar le humanitate. Le humanitate se ha tornate ab le religion, al minus in su importantia real como motor e fonte de inspiration in le vita quotidian. Le resultato de isto es que nos care un

moral basic e ha permittite que se ha developpate un mentalitate, in le qual conflictos, que ha devenite le problemas le plus critic, ha potite facilmente diffunder se. Multe humanos cerca un renascentia spiritual, sed es in discordia como establir lo.

Si on debe notar le inseniamentos del historia, on pote esser secur que le eveliamento venira, sed plus tosto per le apparition de un grande ductor spiritual que per renovation de un del vetere systemas religiose.

Isto es exactemente lo que ha occurrite, secundo le fide Baha'i. Baha'u'llah, qui fundava iste religion, ha per le Baha'is essite acceptate como le Manifestation de Deo pro nostre era, equipate con le mesme guidantia divin e fortia spiritual e dynamic como per exemplo Moses e Jesus. Ille ha, illes crede, le mesme potentia pro disvalidar le dominante fortias negative e ducer le humanitate a un nove nivello de existentia pacific, unite e constructive.

Historia

Le 23 de maio 1844 un juvene persiano annunciava que ille esseva le precursor de un nove personalitate religiose importante e prendeva le titulo de Bab (Le Porta). Multe homines in le tote Persia acceptava su doctrinas, que esseva multo profunde. Sed illos esseva considerate heretic per le leaders fanatic del Islam, le quales insenavia que Mohammed esseva le profeta le plus grande e le ultime, e illes timeva que le Bab'is devenirea un menacia contra lor position. A causa de isto le clericos muslim se univa con le governamento corrupte pro exterminar le nove religion per violentia. Durante duo decennios plus que 200.000 Bab'is suffreva le morte de martyres. Bab ipse on fusilava in 1850 publicamente ante circa 10.000 spectatores. Iste periodo es un era de heroismo e de dramatica in le historia moderne e merita esser melio cognoscite in le Occidente.

Un del Bab'is le plus active esseva Mirza Husayn Ali. Ille, filio de un del ministros del pais, habeva jam como juvene monstrate un interesse plus grande in questiones spiritual que in politica e vita social. Ille acceptava le fide Bab'i jam in su prime tempore e monstrava comprehension profunde pro le doctrinas de Bab. In 1853, quando imprisionate a causa de su activitates como Bab'i, ille percipeva un indication que ille esseva le grande profeta que Bab habeva annunciate, sed ille non proclamava isto publicamente ante 1863, quando ille assumeva le titulo de Baha'u'llah (Splendor de Deo; baha

= splendor, lumine). Le majoritate del Bab’is recognosceva su pretention e deveniva Baha’is, in despecto de actos traitori de homines qui se considerava leaders e esseva disappunctate.

Multe homines hodie ha un tendentia de pensar a profetas como si illes appertineva a eras passate. Il es difficile associar tal personalitates con le mundo moderne e con le problemas quotidian. Tamen il es assi: Non solmente viveva e ageva ille in nostre tempore, sed etiam su message es in le plus alte grado adaptate al besonios de nostre tempore. Ille habeva, in addition, un influentia personal profundissime sur omnes, qui veniva in contacto con ille.

Un orientalista eminentia del universitate de Cambridge, Professor E. G. Brown, qui visitava Baha’u’llah in 1890 e qui esseva le sol occidental qui habeva le privilegio de un tal incontro, scribeva de ille: “Le facie de ille, que io videva, io potera nunquam oblidar, benque io non pote describer lo. Iste oculo penetrante semblava poter leger mi pensatas le plus intime. Fortia e autoritate characterisava su fronte alte. Durante que sulcos profunde sur su fronte indicava un etate avantiate, iste impression esseva contradicite per le capillos e barba ambes nigrissime, e le quales in lor abundantia attingeva quasi su talia. Io non poteva dubitar in cuje presentia io me trovava, genuflectente ante ille, qui es le objecto de un devotion e amor de que reges le poterea invidiar e que imperatores aspirarea in van!”

A causa del persecuciones continuates per le hierarchia islamic e le governamentos persian e turc, Baha’u’llah e su proxime adherentes esseva imprisionate usque al morte de Baha’u’llah 1892 e pro dece-sex annos postea. Le ultime annos de su vita Baha’u’llah passava in le Terra Sancte, in le urbe de Akka, proxime a Haifa e in le loco vicin de Bahji. Durante omne iste annos de imprisionamento ille laborava activemente pro establisir un fundamento firme pro le nove fide per scriptos numerose e inspirate e per administrar su affaires per corresponder e mantener contacto con un affluentia de visitatores. Su letteras potente al monarchas regnante de ille epocha pre-diceva accuratamente le trend del historia moderne. Su scriptos spiritual representa le Scripturas del fide Baha’i, in le qual pro le prime vice le Libro Sancte de un religion major es conservate como illo esseva scribite per un secretario. Iste scripturas es acceptate per Baha’is como le Parola de Deo pro iste epocha, e un portion importante de illos es nunc traducite in multe lingwas.

In su testamento Baha’u’llah nominava su filio primo-genite, Abdu’l-Baha, le figura central in le fide post su morte. Abdu’l-Baha nullemente es considerate como un profeta divinamente inspirate como Baha’u’llah e le

Bab, sed ille es reguardate como un exemplo perfecte de como le essentia del fide Baha'i debe exprimer se in le vita de un humano, e su explanationes de iste inseniamientos, scribite in un stilo un poco plus occidentalise que illo de su patre, es acceptate como lor interpretation autoritative. Ille esseva amate e venerate per omnes qui veniva in contacto con ille.

Abdu'l-Baha e illes qui le accompaniava esseva liberate ab le prision per le revolution del "juvene turcos" in 1908. Ille se translocava a Haifa e hodie se trova ibi le centro international del fide sur le monte Carmel, ubi on ha construite belle templos e jardines. Per le viages de Abdu'l-Baha in Europa in 1911 e in America in 1912 un grande numero de occidentales veniva in contacto con le religion Baha'i. In 1920 ille recipeva le titulo de "knight" del Imperio Britannic pro su activitates humanitari durante le prime guerra mundial. Ille ha morite in Haifa in 1921, in su 77e anno.

In su testamento Abdu'l-Baha nominava su granfilio Shogi Effendi, alora studente al universitate de Oxford, Protector (Guardiano) del fide. Durante 36 annos Shogi Effendi laborava pro reinfortiar e developpar le Ordine Administrative del Religion Baha'i. Su proprie scriptos ha expandite le horizontes del fide e ha indicate a illo le direction durante un periodo extrememente difficile de su historia. Su vision del fide, su comprehension del conditions in le mundo e su capabilitate superior como administrator es considerate per le Baha'is como un producto de guidantia divin, donate a ille in su position de interpretator del doctrinas Baha'i.

Le 4 novembre 1957 Shogi Effendi ha morite in London de un collapso cardiac. Shogi Effendi habeva nominate vinti-septe personas pro esser "Manos del Causa" e servir temporarimente como functionarios guidante. Per lor effortios le prime Domo Universal de Justitia esseva eligite in 1963 per le cinquanta-sex Assembleas Spiritual National existente a ille tempore, in accordantia con le provisiones in le scriptos de Baha'u'llah e Abdu'l-Baha pro le election de iste institution supreme del fide Baha'i. Democraticamente eligite le Domo Universal de Justitia, functionante como un unitate, es le recipiente de guidantia divin como assecurate in le scriptos de Baha'u'llah. Illo age como le supreme corporation legislative in le mundo Baha'i, applicante le doctrinas de Baha'u'llah a conditions e problemas specific, e providente le adaptabilitate necessari a nove circumstantias, lo que es essential in iste epocha si rapidemente cambiante.

Dogmas religiose

Baha'u'llah re-establivia e re-affirmava le convention inter Deo e le humano – iste promissa gloriose recordate in varie religiones previe, sed quasi ignorate hodie. In iste convention Deo promitte guidar e adjutar le humantate a un progresso spiritual per su manifestationes o manifestatores. Le humano, de su parte, accepta un responsabilitate continue a amar Deo e sequer su prescriptiones e leges, como revelate per le profetas in omne tempores e in omne aspectos de su vita. Il es le manco de responsabilitate verso su creator que se reflecte como un manco de un moralitate firme in le humano moderne, e per consequentia, le face susceptible al prejudicios e conflictos que age contra le proprie interesses del humano.

Le Bahaismo require un nivello extrememente alte de conducta moral. Monogamia es obligatori e un conducta caste es laudate. Maritige require le consentimento de omne parentes vivente, e divorcio debe esser precedite per un anno de separation de proba e un tentativa de reconciliation. Alcohol e narcoticos es prohibite excepte pro objectivos medical. Puritate, honestitate, generositate e altruismo es virtutes fundamental; e un senso de responsabilitate pro nostre proximos es emfasate. Calumnias e garrulage de alteros es condemnate. Baha'is non es restringite in lor vita, sed es incoragiate a gauder del beltates e del placeres que le mundo offere. Le restrictiones in le leges moral non es vestigios dismodate de doctrina puritan sed un nove assecurantia ab Deo que iste modo de conducta va ducer al plus grande felicitate e satisfaction in le vita.

Baha'u'llah reaffirma un credo in le immortalitate del anima individual e extende le cognoscentia del natura del vita post le morte. Le objectivo del humano sur le terra es amar e adorar Deo, ganiar cognoscentia re ille per le inseniamientos del profetas, e progreder spiritualmente per applicar iste inseniamientos in su vita quotidian. Progresso attingite assi va esser continuata post le stadio quando le anima essera liberate ab le corpore e ha movite a su proxime nivello de existentia. Isto es le “premio” (paga) mesurate pro effortios spiritual, tanto differente del idea de assignar le anima a un celo o un inferno in lor senso litteral.

Le scriptos Baha'i etiam contine multe explications del sectiones difficile e symbolic de scripturas de ancian religiones, clarificante questiones que ha essite fontes de division religiose e relatante multes del passages profetic a eventos historic. Le attitude es rational e in accordo con principios scientific moderne, sed tamen illo include un elemento de fide in

areas que ultra-passa le leges del natura como on los comprende hodie.

Le prece joca un rolo importante in le devotion Baha'i, e multe belle preces ha essite revelate in le scripturas. Le principio fundamental in le attitude Baha'i verso le vita es: Facer le credente harmonic e ben adjustate a su ambiente. Isto non es un fide ascetic, sed illo insenia que le vita spiritual se vive activemente in le societate, cooperante in labor creative e demonstrante le principios de Baha'u'llah per le application practic.

Doctrinas politic e social

Le fide Baha'i offere doctrinas plus comprehensive concernente subjectos politic, economic e social que religiones previe. On debe tener in le memoria que Baha'u'llah enunciava iste principios inter le annos 1863 e 1892, quando monarchia esseva le forma prevalente de governamento e quando le revolution industrial habeva a pena comenciate.

Le idea fundamental de iste ideas es le principio del **UN-itate** del humanitate. Previamente le religiones ha essite regional in lor influentias, sed in nostre epocha pro le prime vice le mundo ha devenite unificate fysicamente. A fin que le humanos pote viver sub tal conditiones, illes debe etiam acquirer unitate spiritual, politic e economic. Per le principio del revelation progressive Baha'u'llah ha facite possibile un reconciliation del doctrinas del religiones major. Le intention es que le fide Baha'i va ducer le populos gradualmente verso le adoption de un fide universal, que va clauder le abysmos spiritual e cultural que nunc existe. Isto va facer nos comprender que nostre loyalitate basic es al humanitate integre, plus tosto que a un certe nation o gruppo, lo que va temperar le intensitate del nationalism, un del causas principal del conflictos de nostre epocha.

Pro implementar iste principio del un-itate del humanitate, Baha'u'llah visualisava le formation de un **federal governamento mundial** con autoritate super tote relationes international, e con tal institutiones necessari como un **tribunal mundial e un fortia policiari international**. Un **lingua international** debe esser apprendite per omnes in addition al lingua national, como un medio importante pro augmentar comprehension per melior communication. Un metodo universal pro tractar problemas economic debe esser adoptate pro eliminar gradualmente le barrieras contra libere commercio mundial. Travalio facite in le spirito sia reguardate como un forma de adoration de Deo. **Guerras debe esser abolite e tote le energia**

del humanos concentrate sur activitates constructive. Extreme ricchessa e povritate debe esser eliminate e le humanos debe con gaudio adjutar lor co-humanos minus fortunate.

Baha'u'llah emfasa le importantia de **eliminar tote le formas de prejudicios e de superstition, particularly prejudicios racial**. Iste problema es tractate plus profunde- e emphaticamente que in altere religiones e es regardate como un responsabilitate spiritual e non solmente como un problema humanitari o educational.

Le fide Baha'i etiam insenia que **religion e scientia non es contradictori sed es in harmonia e accordo**. Cata un tracta un aspecto del existentia que es necessari pro le progresso del humano e ambes debe esser regardate como alliatos in le lucta eterne pro ameliorar se. Le fide etiam emfasa le necessitate de **education pro omnes, equalitate de viros e feminas, e le investigation independente del veritate**. Nulle coercition sia usate pro facer alcuno acceptar un punto de vista particular concernente le questiones fundamental del vita; cata uno debe con corage e honestitate abbordar iste questiones, studiar e scrutinar los de omne punctos de vista e considerar lo como un privilegio e un responsabilitate que on pote ipse prender le decision e ager conformemente.

Baha'is crede que iste principios representa un schizzo del societate mundial del futuro, le qual Deo per Baha'u'llah ha date al humanitate como le sol remedio pro le problemas dominante le mundo de hodie. Si le enorme ressources del moderne scientia e technica potera esser utilisate constructivamente e non pro destruer le humanitate, il es necessari que iste principios avantiate essaera realisate in le practica. Nulle de illos pote esser separate ab le alteres, e lor plen realisation es toto dependente del regeneration spiritual que debe occurrer ante que le humanitate essaera preste ideologicamente a applicar los con successo.

Il ha multe prejudicios profundemente inradicate e il ha attitudes que on debe eliminar antea, e solmente le potentia de Deo, que ha causate alterationes equalmente dramatic in le passato, pote esser expectate a producer isto.

Ordine administrative

In su qualitate de un nove expression religiose, que labora sub conditions grandemente cambiate, le structura organisational differe in respectos importante ab le organisation de vetere religiones. In le fide Baha'i il ha

nulle clericos professional. In le varie functiones, administration, education, beneficentia e adoration, participa omne Baha'is, eligite democraticamente o habente presentate se ipse como voluntarios pro laborar secundo lor capabilitate. Le unitate que es le base del organisation es le Assemblea Spiritual Local que consiste de novem membros eligite annualmente. Illo pote esser organisate in cata urbe, village o districto, ubi se trova al minus novem Baha'is adulte. Illo pote nominar comitá, ás pro deberes special e illo es responsabile, intra su area, pro le progresso e ben-esser del fide e del credentes. Similemente le Assemblea Spiritual National, etiam con novem membros eligite es responsabile pro le affaires del fide sur nivello national. Le Domo Universal de Justitia es le autoritate administrative supreme pro omne Baha'is in le mundo.

In le fide on pone grande emfase sur le desirabilitate de un attitude spiritual a consultation intra un gruppo. Talmente on pote substituer imperfectiones human e conflictos infructuose per consultation constructive. On expecta que cata membro presenta su punctos de vista tanto habilmente como ille pote, e post isto, que omnes face un effortio de tote corde pro developpar un punto de vista commun, le qual representa le sapientia collective del membros.

Le activitates del fide es financiate solmente per contributiones voluntari de Baha'is. Contributiones de non-Baha'is es acceptate solmente pro beneficentia. Collectiones es nunquam facite a reuniones.

Como un symbolo de un mundo futur unificate, le Baha'is ha erigite templos. In iste templos es benvenite humanos differente in attitudes, religiones, racias e nationalitates pro adoration commun. Post le prime templo in Ashkhabad, le capital de Turkmenistan, on ha construite ancora septe in Wilmette (Statos Unite de America), Panama (America Central), Sidney (Australia), Kampala (Uganda, Africa), Frankfurt (Germania) e New Delhi (India) e Samoa del West. Planos existe pro templos ulterior. Circum illos es o essera construite belle jardines e scholas, universitates, hospitales, focares pro veteres e altere institutiones simile.

Baha'is se reuni cata dece-novem dies pro adoration commun, consultation re le activitates del Assemblea e pro con-esser amical e recreative. On etiam celebra dies festive, al quales pote participar etiam alteres que Baha'is.

Le communitates local es libere a organizar comocunque illos vole e pote, activitates pro informar e inseniar le publico. Al presente le plus importante es que on attinge le plus grande numero possibile de homines. Un serie de planos pro le expansion del fide in le mundo esseva initiate in 1937 e Assembleas nunc se trova in 148 païses del terra, e le progresso

continua secundo le planos.

Baha'i ha le conviction que le ordine administrative que illes construe e le qual pone le doctrinas in practica tanto completamente como illes lo pote, es un 'modello de laboratorio' del ordine mundial del futuro. Illo es un societate in miniatura sin conflictos national o ideologic, sin prejudicios racial, sin distinction de classes e sin barrieras de differentias religiose. Hodie, in 1992, il ha Baha'i in 130 000 locos, in le mundo integre inter 5 e 6 millones. Illes veni ab tote classes social, nationes, religiones e racias. Illes crede que le mundo, poco a poco, essera fortiate cercar un via ex le chaos nunc prevalent, e a ille momento le humanos essera conscie del exemplo del societate Baha'i existente in lor medio – un societate fundate sur principios spiritual e con un programma social avantiate, que es adaptate pro le besonios del humanitate.

Summario

Le fide Baha'i es un religion, un societate e un modo de viver. Illo reoffere veritates spiritual que le mundo besonia, sed ab le qual illo se ha avertite, e illo ha principios pro le societate que es nove e apte pro le requerimientos de nostre era. Illo se trova ancora in infantia con su plus grande successos expectante in le futuro. Illo offere a su credentes non solmente un responsa al problemas personal create per un societate moderne complexe, sed etiam le satisfaction de participar in le construction de un nove fide, destinate a grandor per le facto que illo porta le message le plus nove de Deo al mundo e illo es le canal per le qual tote le humanitate pote esser ducite al unitate que es su salvation unic.

In le parolas de Shogi Effendi: "Le principios del un-itate del humanitate ... representa le consummation del evolution human – un evolution que habeva su primissime initios in le nascentia del vita familial, su developpamento subsequence in le formation del solidaritate tribal, ducente in su torna al constitution del urbe-estado e expandente plus tarde usque al institution de nationes independente e soveran."

Le principio del unitate del humanitate, como proclamate per Baha'u'llah, porta con se ni plus ni minus que un assecuration que attinger iste stadio final de iste evolution stupende non es solmente necessari sed inevitabile, que su realisation se approcha rapidemente, e que nihil minor que un fortia emanante ab Deo pote succeder in establisir lo."